

HARRIS, JOSEPH ('Gomer'; 1773 - 1825), gweinidog y Bedyddwyr

Enw: Joseph Harris

Ffugenw: Gomer

Dyddiad geni: 1773

Dyddiad marw: 1825

Priod: Martha Harris (née Symons)

Plentyn: Hannah Stephen (née Harris)

Plentyn: John Harris

Plentyn: John Ryland Harris

Rhyw: Gwryw

Galwedigaeth: gweinidog y Bedyddwyr

Maes gweithgaredd: Crefydd; Llenyddiaeth ac Ysgrifennu; Ysgolheictod ac Ieithoedd

Awdur: William Joseph Rhys

yn yr Heol Gefn, Abertawe; ganwyd yn fab i hwsmon yn Llantydewi ger Casblaidd, Sir Benfro, a bedyddiwyd ef yn Llangloffan tua 1792/3. Wedi ei gynhesu yn niwygiad Casmael yn 1795, dechreuodd bregethu, a chyhoeddi *Casgliad o Hymnau* yn 1796 at y rhai a gyhoeddasai yn 1793. Priododd Martha Symons, Casnewydd-Bach, a daeth yn 1801 i'r Heol Gefn, a mynd am bedwar mis i athrofa Bryste. Cythryblodd Arminiaeth yr Heol Gefn yn 1800, a blinid yr Hen D Cwrdd gan Undodiaeth; cyhoeddodd yntau *Bwyall Crist yng Nghoed Anghrist* yn 1804. Gadawodd ei *Traethawd ar Briodol Dduwdod ein Harglwydd Iesu Crist*, 1816-7, ei ddelw ar ddiwinyddiaeth llawer. Enillodd gymeradwyaeth Drindodiaid pob cyfundeb ymron. Cadwodd draddodiad pregethu'r Diwygwyr yn fyw. Llafuriodd yn eiddgar dros y Gymraeg a chanu'r cysegr. Cyhoeddodd *Casgliad o Hymnau* yn 1821, ag ynddo lawer o'r eiddo'i hun, a'u gwerthu gyda phethau eraill yn ei siop lyfrau. Cadwai ysgol-ddydd. Gellir ei alw'n dad y newyddiadur Cymraeg. Ei *Seren Gomer*, 1814-5, oedd yr wythnosolyn cwbl Gymraeg cyntaf. Er i'r ymgymeriad ei golledu'n fawr, ac er iddo fethu gyda hwn fel gyda'i *Greal y Bedyddwyr*, 1817, a'r *Drysorfa Efengylaidd*, 1806, y ceisiodd ef a [Titus Lewis](#) ei redeg, fe lwyddodd ei *Seren Gomer* bythefnosol (1818). Cyhoeddodd hefyd *Yr Anghyffelyb Broffeswr* (cyfieithiad), 1802, *Y Beibl Dwyieithawg*, *Esboniad Dr. J. Gill ar y Testament Newydd*, wedi ei drosi yn Gymraeg ganddo ef a [Thitus Lewis](#) a [Christmas Evans](#), a *Cofiant Ieuan Ddu*, ei fab. Bu farw 10 Awst 1825, ychydig dros 52 mlwydd oed.

Awdur

Y Parchedig William Joseph Rhys, (1880 - 1967)

Ffynonellau

D. Rhys Stephen, *Cofiant Joseph Harris* (Gomer)

W. Rowlands, *Llyfryddiaeth y Cymry*

Trafodion Cymdeithas Hanes Bedyddwyr Cymru, 1930

Darllen Pellach

Erthygl Wicipedia: [Joseph Harris](#)

Delweddau

LLGC: [Joseph Harris, 'Gomer'](#)

Dolenni Ychwanegol

VIAF: [24460744](#)

Wikidata: [Q6283821](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

